

御

金薤琳琅卷第五

太僕少卿吳郡都

穆

漢執金吾丞武榮碑

漢荊州刺史度尚碑

漢桂陽太守周府君碑

并陰

漢衛尉衡方碑

漢執金吾丞武榮碑

君諱榮字含和治魯詩經韋君章句闕幘傳

講孝經論語漢書史記左氏國語廣學甄微

靡不貫綜久遊太學藐然高厲鮮於雙匹學

優則仕為州書佐郡曹史主簿督郵五官掾  
功曹守從事年卅六汝南蔡府君察舉孝廉  
闕二郎中遷執金吾丞遭孝桓大憂屯守玄  
武感哀悲慟加遇害氣遭疾隕靈闕四君即  
吳郡府卿之仲子燉煌長史之次第也廉孝  
相承亦世載德不忝闕四命闕不竟台衡蓋  
觀德於始述行於終於是刊石勒銘垂示無  
窮其辭曰

天降雄彥資才卓茂仰高鑽堅允文允武內  
闕一三署外闕師旅闕勒屯守舊威闕武闕

旗絳天雷震電舉歎燿赫然陵惟哮虎當遂  
股肱闕之元輔天何不弔降此闕咎瘕平我  
君仁如不壽爵不副德位不稱功感懷傷愴  
遠近哀同身沒闕二萬世諷誦

右漢執金吾丞武榮碑歐陽公謂其文  
字殘缺不見卒葬年月及氏族所出予  
家本殘缺與歐公同而隸釋所載者則  
又徃徃可讀如云君即吳郡府卿之子  
燉煌長史之次第此乃其氏族之所出  
也但碑文簡短不書卒葬年月歐公特

未之知耳

漢荊州刺史度尚碑

君諱尚字博平其先出自顓頊與楚同姓熊  
嚴之後闕亦世掌位統國法度秦兼天闕和  
之純質秉黃中之正性智含淵藪仁隆春煖  
義高秋雲行潔冰霜慷慨壯厲臨闕休譽固  
已著矣及其典牧必招振賢才抽拔幽逸選  
召所任極當世之秀士養民有闕令聞彌崇  
暉光日新可謂盛德者已初奉歲計拜郎中  
除上虞長玄化潛洞百姓闕數縣息信並宣

令行禁止以從父憂去官更舉孝廉為右校  
令是時南蠻蠢動擢拜闕醜殊俗賓服遠人  
用綏封右鄉侯遷遼東太守旬月之間歲務  
寧輯會楊賊畔於闕拜中即將料敵制勝威  
謀合神持重優於營平深入則輕冠軍附士  
渥於李廣御衆闕同滋味必達井辨幕然後  
飲舍惠以厚下說以犯難是故所征輒克師  
徒無頽闕寇殄殪干戈載戢走馬以糞朝貪  
厥重復拜荊州刺史以故秩居冊書慰薦因  
賜闕之荆域號慕雖周人之思召伯弗此踰

也於是故吏感清廟之頌歎斯父之詩乃闕  
曰於惟我侯允懿允明文武是該克忠克貞  
粵初發藻在彼上虞邁種厥德闕矣匪祿是  
榮無言不讎帝揚厥聲俾作配闕往撫于荆  
撫荆惟何南夏是闕邦家截彼海外績莫匪  
嘉天生我侯實爲民望心乎其愛四方是印  
如何不永闕而不死芳烈遺兮

永康元年歲在鶉尾龍集丁未時維闕歲闕  
右漢荊州刺史度尚碑尚後漢書有傳  
碑今在徐州州治蓋成化間吾鄉顧君

崇善以工部郎中管理河道見其淪於  
湖陵城闕出之遂置於此按酈道元水  
經注云湖陵城東有度尚碑則自漢至  
晉自晉至今而此碑未嘗徙也又隸釋  
云政和中巡檢王當世見其在湖陵荒  
野遷之官廨後邑令滕君欲徙碑於沛  
舟載而覆沉沒不出又其後劉宗儀攝  
令乃立之於使星亭然不知此碑何年  
復淪入水中今惟存其首漢荊州刺史  
度侯之碑九字其餘文字悉皆漫滅特

頑然片石而已蓋聞水撞激日久其字  
之不存宜也

今漢桂陽太守周府君碑

桂陽太守周府君者徐州下邳人也諱憬字  
君光體性敦仁天姿篤厚行與閨門名關州  
里舉孝廉拜尚書侍郎遷汝南固始相遂拜  
桂陽廼宣魯衛之政敷二南之澤政以德綏  
化猶風騰撫集烝細關綏有方進則貞直退  
則錯柱崇舉濟濟吉士充朝招訓關蒙開誘  
六蔽君子道長小人道消信感神祇靈瑞符

關嘉穀生於野竒草像

關

莆異根之樹超

然連理於此

關

時邦域惟寧郡又與南海接

比商旅所臻自瀑亭至乎曲紅壹由此水其

水源也出於王禽之山山蓋隆

關

于天泉

肇沸踊發射其顛分流離散為十二川彌陵

隄阻丘阜錯連隅陬壅遏末由騁焉爾乃貫

山鑛石經

關

四

揚爭怒浮沈潜伏地龍蛞屈

澧隆鬱浥千渠萬澮合聚谿澗下迄安

關

一

六瀧作難湍瀨

關

二

泫云潺湲雖詩稱百川

沸騰高岸為谷深谷為陵蓋莫若斯天軌所

經惡得已改其下注也若奔車失轡狂牛無  
 縻闕勿荒忽臚睦不相知及其上也則群輩  
 相隨檀柁提闕唱號慷慨沈深不前其成敗  
 也非徒喪寶玩墮珍竒替珠貝流象犀也往  
 古來今變甚終矣於是府君乃思夏后之遺  
 訓闕應龍之畫傷行旅之悲窮哀闕一人困  
 厄感蜀守冰殄絕犁堆嘉夫昧淵永用夷易  
 廼命良吏闕一帥壯夫排積闕一石投之寒  
闕二高填下鑿截回曲弼水之邪性順導其  
 經脉斷浪溢之電波弱陽侯之凶涌由是小

蹊乃平直大道允通利抱布貿絲交易南至  
 升涉周旋功萬於前除昔闕二樹塞於茲雖  
 非龍門之鴻績亦人君之德宗故船人嘆於  
 水渚行旅語於塗陸孔子曰禹不決江踈河  
 吾其魚矣於是熹平三年歲在攝提仲冬之  
 月曲紅長零陵重安區祉字景賢遵承典憲  
 宣揚德訓帥禮不越欽仰高山乃與邑子故  
 吏龔臺郭蒼龔雒等命工擊石建碑于瀧上  
 勒銘公功傳之萬世垂示無窮其辭曰  
 乾坤剖兮建兩儀剛柔分兮有險夷咨中嶽

兮穆崔嵬嘆衡林兮獨傾虧增陵峭兮甚隘  
陪鮫莫涉兮禹不規仰王禽兮又崑崙俯瀧  
淵兮怛以悲岸參天兮無路蹊石縱橫兮流  
洄洄波隆隆兮聲若雷或抱負兮以從利或  
追恩兮有赴義汜自楫兮有不避闕躬軀兮  
於玄池委性命兮於芒緇惜寒慄兮不皇計  
忽隨流兮殆忘歸懿賢后兮發聖英閉不通  
兮治斯谿蹙巨石兮以湮填開切闕一兮導  
曲機摧六瀧兮弱闕五字兮散其波威怒定兮  
混瀾瀾息聊啾兮闕五字逝兮蛟龍藏睦老唱

兮臚人歌名冠世兮超踰倫今稱闕兮耀流  
沙功斐斐兮鏡海裔君乎君壽不訾

右漢桂陽太守周府君碑歐公謂其名  
已殘闕但知其字為君光而已趙氏引  
曾南豐之言謂周君名昕以為歐公考  
之未詳而其後小字復謂歐公集別有  
一跋云周君名憬而又以為字頗近之  
予按隸釋云君諱憬字君光與歐公後  
跋正合則南豐所謂名昕者固為失之  
而趙氏又何必置疑於其間哉



此碑元季廬陵陳謨跋謂漢刻本在隴  
上唐重刻本在曲江廟中不知何時徙  
置郡學韶州守錢旭既新府治以韶在  
漢屬桂陽乃徙置之後楊文貞公跋亦  
云碑在韶州府治按府治今為王府  
碑由是仍徙曲江廟中東廣漢碑絕少  
所有惟斯而已

周府君碑陰

故曲紅長零陵重安區祉字景賢故含涯長  
南郡關一蒼陸字關夏故涇陽守長南平丞

長沙漢昌蹇祇字宣節故行事來陽華夏字  
漢威故荊州從事曲紅龔臺字少謙故荊州  
從事曲紅郭蒼字伯起故荊州從事柳王鼎  
字季尼故南部督郵曲紅龔雒字關然故吏  
曲紅鄧音字孝直故吏曲紅朱隲字義德故  
吏曲紅張涼字子才故吏曲紅龔達字叔通  
故吏曲紅黃部字世尼故吏曲紅周蓋字伯  
嘗故吏曲紅黃晏字子齊故吏曲紅馬珪字  
元序故吏曲紅潭承字曼升故吏曲紅劉鵠  
字季產故吏曲紅黃祺字叔仁故吏曲紅周

習字仲鸞故吏曲紅劉越字子省故吏柳褚

禧字闕讓故吏來陽蔡闕字已明故吏涇陽左

尉零陵泉陵字闕三故吏涇陽劉萌字仲闕故

吏涇陽左勝字仲升故吏涇陽左蘇字妙舉

故吏涇陽宋碩字子張故吏含涇堯禹字公

制故吏含涇張邵字曼威故吏含涇黃詳字

伯節工師南陽宛王遷字子彊字涇堯禹字公

漢衛尉衡方碑

府君諱方字興祖肇先蓋堯之苗本姓闕二

則有伊尹在殷之世號稱阿衡因而氏焉闕三

字土家于平陸君之烈祖少以儒術安貧樂

道履該顏原兼脩季由聞斯行諸砥仁厲闕四

字土階夷愍之貢經常伯之賓位左馮翊先

帝所尊垂名竹帛考廬江太守兄鴈門太守

字闕三孝長發其祥誕降于君天資純懿昭前

之美少以文塞敦龐允元長以欽明耽詩悅

書闕三秋仕郡辟州舉孝廉除郎中即丘侯

相膠東令遵尹鐸之導保鄣二城參國起按

斑叙字闕三本肇末化速郵置州舉尤異遷會

稽東部都尉將繼南仲邵虎之軌飛翼軫之

旌操參字三綏來王之蠻會喪太夫人感倍

人之凱風悼蓼莪之劬勞寢闇苦字一仍闕

上言倍榮向哀札服祥除徵拜議郎右北平

太守尋李廣之在邊恢魏絳之和戎戎戢土

佚費省巨億懷字四靜有績遷潁川太守脩

清滌俗招拔隱逸光大茅茹國外浮字一淡

界繆動氣泄狂字五歸來洙泗用行舍藏徵

拜議郎遷太醫令京兆尹舊都餘化詩人所

詠並有亡新君字四隆寬慄鶉火光物隕霜

剝姦振滯起舊存亡繼絕恩降乾太威肅剝

坤本朝錄功入登衛字二翼紫宮夙夜惟寅

委蛇在公有單襄穆典謨之風詔選賢良招

先逸民君務在闕失順其文舉已從政者退

就勅巾永康之末君衛孝桓建寧初政朝用

舊臣留拜步兵校尉處六師之帥維時假階

將授袞職受任浹旬奄離寢疾年六十有三

建寧元年二月五日癸丑卒詔遣使字二弔

賻禮百賓臨會莫不失聲其年九月十七日

辛酉葬蓋雅頌興而清廟肅中庸起而祖宗

闕故仲尼既歿諸子綴論斯于作歌用昭于

宣字闕一以旌德銘以勒勲於是海內門生故吏闕三采嘉石樹靈碑鐫茂伐祕將來其辭曰

峨峨我君懿烈孔純高朗神武歷世忠孝馮隆鴻軌不忝前人寬猛不主德義是經韜綜頊闕温故前呈攬英接秀踵迹晏平初據百里顯顯令聞濟康下民曜武南會邊民是鎮惟闕三憂及退身參議帝室剖符守藩北靖闕二有闕有聲旋守中嶽幽滯以榮邁種舊京闕四含澤戴仁闕二攸寧克長克君不虞

不陽維明維允耀闕一聲香能抵能惠剋亮

天功入統闕二赳赳光光法言稽古道而後

行兢兢業業素絲羔羊閭閻侃侃顯顯昂昂

何規履架金玉其相寒寒王臣群公憲章樂

只君子闕二無疆銘勒金石闕五問闕二萬

世是傳門生平原樂

右漢衛尉衛方碑其叙門闕云伊尹在殷號稱阿衡因以為氏君考廬江太守兄鴈門太守叙官秩云歷郎中即丘侯相膠東令遷會稽東部都尉徵拜議郎

北平潁川兩太守太醫令京兆尹入登衛尉至步兵校尉叙卒葬云年六十三建寧元年二月五日癸丑卒其年九月十七日辛酉葬又字詳悉頗為完好漢碑中之不易得者洪丞相謂碑云履該顏原即顏淵原憲予觀其下繼之云兼修季由蓋仲由一字季路季由即季路也

金薤琳琅卷第五

金薤琳琅卷第六

太僕少卿吳郡都

穆

漢酸棗令劉熊碑

漢淳于長夏承碑

漢西嶽華山廟碑

漢玄儒先生婁壽碑

漢蕩陰令張君碑

漢酸棗令劉熊碑

君諱熊字孟闕廣陵海西人也厥祖天皇大

帝垂精接感篤生聖明闕仍其則子孫亨之

分源而流枝葉扶疏出王別胤受爵列土封侯載德相繼丕顯闕五光武皇帝之玄孫廣

陵王之孫俞鄉侯之子也誕生照明岐嶷

踰絕長闕四柴守約履勤體聖心叡敦五經

之瑋圖兼古業覈其妙行脩言道闕五宜京

夏莫不師印六藉五典如源如泉既練州郡

卷舒委隨忠貞闕三出省楊土流化

南城政猶北辰衆星所從三祀有成來臻我

邦循東闕之惠抑闕禮官賞進厲頑約之以

禮博之以文政教始初慎徽五典勤恤民殷

闕心顧下闕二仁恩如冬日威猛烈炎夏貪

究革情清脩勸慕德惠潛流鬯芳旁布尤愍

縣闕濟濟之儀孜孜之踰帥厲後學致之雍

泮草上之風莫不嚮應悅誨日新砥闕二素

七業勃然而興咸居今而好古雖未盡道善

必有所由處民之秉彛寔我劉父其人魯無

君子斯焉取旃允我劉父言善誘人講禮習

聆匪徒豐學屢獲有年闕載充成神民協欣

兩不相傷故德交歸焉自古在昔先民有作

洪勳則甄盛德闕刻表諸來世垂之罔極襄

二

賢表善揚幽拔微式序在位量能授宜官無  
曠事字關二為正以卒為更愍念烝民勞苦不

均為作正彈造設門更富者不獨逸樂貧者

關順四時積和感暘歲為豐穰賦稅不煩寔

我劉父吏民愛若慈父畏若神明悔關令德

清越孤竹德牟產竒誠宜褒顯照其憲則乃

相關咨度諏詢采摭謠言刊關詩三章其辭

曰

清和穆鑠寔惟乾字關一惟嶽降靈篤生我君服

骨叡聖允鍾厥醇誕生岐嶷言協關墳懿德

震耀孝行通神動履規繩文彰彪續成是正

服以道德民

有父子然後有君臣理財正辭束帛戔戔關

夢刻像鶴鳴一震天臨保漢寔生關勲明試

賦授夷夏已親嘉錫來撫潛化如神其神伊

何靈不傷人

猗歟明哲秉道之樞養關之福惟德之偶淵

乎其長渙乎成功關暇民豫新我關通用行

則達以誘我邦賴茲劉父用說其關澤零年

豐黔首歌頌

右漢酸棗令劉熊碑集古錄作俞鄉侯  
季子碑且謂碑云君諱熊字孟下缺一  
字復引後漢書光武子曰廣陵思王荆  
荆子元壽等四人皆封鄉侯而不載其  
名俞鄉侯者不知爲誰金石錄引酈道  
元水經注云酸棗城內有漢縣令劉孟  
陽碑則所缺一字當從水經爲陽又引  
李利涉編古命氏及唐宰相世系表皆  
云荆王生俞鄉元侯平生彪襲封則  
熊當爲彪之弟乃光武曾孫而曰玄孫

者碑之誤也隸釋謂歐陽公不知碑在  
酸棗無以名其官遂謂之俞鄉侯季子  
碑而引王建題此碑詩云不向圖經中  
舊見無人知是蔡邕碑而又疑其非中  
郎筆法予則以爲建生於唐其云蔡邕  
碑者蓋本之圖經而非鑿空而言洪氏  
不當於此而疑之也

淳于長夏承碑

君諱承字仲充東萊府君之孫太尉掾之仲  
子右中郎將弟也累葉牧守印紱典據十有



餘人皆德任其位名豐其爵是故寵祿傳于  
歷世策薰著于王室君鍾其美受性淵懿含  
和履仁治詩尚書兼覽羣藝靡不尋暢州郡  
更請屈已匡君爲主簿督郵五官掾功曹上  
計掾守令冀州從事所在執憲彈繩糾枉忠  
潔清肅進退以禮允道篤愛先人後已克讓  
有終察孝不行大傳胡公歆其德美旌招俯  
就羔羊在公四府歸高除淳于長到官正席  
流恩褒善糾姦示惡旬月化行風俗改易輶  
軒六轡飛躍臨津不日則月皓天不弔殲此

良人年五十有六建寧三年六月癸巳淹疾  
卒官嗚呼痛哉臣隸辟踊悲動左右百姓號  
咷若喪考妣孩孤憤泣切怛傷摧勒銘金石  
惟以告哀其辭曰

於穆皇祖天挺應期佐時理物紹縱先軌積  
行勤約燕于孫子君之羣戚並時繁祉明明  
君德令問不已高山景行慕前賢列庶同如  
蘭意願未止中遭冤友不終其紀夙世實祚  
早喪懿寶抱噐幽潛永歸蒿里痛矣如之行  
路感動儻魂有靈垂後不朽

右漢淳于長夏承碑金石錄云元祐中  
洛州因治河得之於土壤中刻畫完好  
如新隸釋云此碑字體竒怪唐人蓋所  
祖述又引梁庾元威論書載隸有十餘  
種此乃其間之一體宋鄭僑書衡云漢  
石經諸刻乃隸體八分夏承碑乃篆體  
八分然三家皆不言爲何人書也元王  
文定公惲跋此碑云蔡邕書夏承碑如  
夏金鑄鼎形模怪譎雖蛇神牛鬼厖雜  
百出而衣冠禮樂已胚胎乎其中所謂

氣凌百代筆陣堂堂者乎予由是始知  
爲中郎之蹟碑在今廣平府學後刻尚  
書蔡邕伯喈及永樂七年等字乃庸妄  
人所加然心竊疑之楊文貞公集中亦  
有此跋謂近歲廣平府民因治河得此  
蓋廣平古洛地也所謂近歲恐即永樂  
七年予向官京師時廣平通判山西宋  
孟清爲予言府學復有一碑字與此類  
予益疑焉江陰徐子擴好竒士也嘗得  
舊刻雙鈎其字近以惠予與此絕異此

云勤紹舊刻作勤約且其間字之闕者四十有五而此獨完好則其僞不俟乎言而予昔日之疑始釋然矣

楊公跋又謂中書舍人陳登以碑爲蔡伯喈書蓋不攷王氏文集之故後公撰登墓志言永樂間以篆書名者登之外有吳中滕用亨及四明王尹實予觀三家之篆用亨第一登不能逮若尹實則惟用燥筆又在登之下登門人有程南雲者以篆書得至顯官其用筆雖熟然

殊乏古法觀此亦可以知其師矣

### 漢西嶽華山廟碑

周禮職方氏河南山鎮曰華謂之西嶽春秋傳曰山嶽則配天乾坤定位山澤通氣雲行雨施旣成萬物易之義也祀典曰日月星辰所昭仰也地理山川所生殖也功加於民祀以報之禮記曰天子祭天地及山川歲徧焉自三五迭興其奉山川或在天子或在諸侯是以唐虞疇咨四嶽五歲壹巡狩皆以四時之中月各省其方親至其山柴祭燔燎夏商

則未聞所損益周鑒於二代十有二歲王巡狩殷國亦有事于方嶽祀以圭璧樂奏六歌高祖初興改秦淫祀太宗承循各詔有司其山川在諸侯者以時祠之孝武皇帝脩封禪之禮思登假之道巡省五嶽禋祀豐備故立宮其下宮曰集靈宮墜曰存僊墜門曰望僊門仲宗之世重使使者持節祀焉歲一禱而三祠後不承前至于亡新寤用丘虛訖今垣趾營兆猶存建武之元事舉其中禮從其省但使二千石以歲時往祠其有風旱禱請祈

求靡不報應自是以來百有餘年有事西巡輒過享祭然其所立碑石刻紀時事文字靡滅莫能存識延熹四年七月甲子弘農太守安國亭侯汝南袁逢掌華嶽之主位應古制脩廢起頓閔其若茲深達和民事神之義精通誠至禘祭之福乃案經傳所載原本所由銘勒斯石垂之于後其辭曰

巖巖西嶽峻極穹蒼奄有河朔遂荒華陽觸石興雲雨我農桑資糧品物亦相瑤光崇冠二州古曰雖梁馮于幽岐文武克昌天子展

義巡狩省方玉帛之贄禮與岱元六樂之變  
舞以致康在漢中葉建設宇堂山嶽之守是  
秩是望矣惟安國兼命斯章尊脩靈基肅共  
壇場明德惟馨神歆其芳遏禳凶札犁歛吉  
祥歲其有年民說無疆

袁府君肅恭明神易碑飾闕會遷京兆尹孫  
府君到欽若嘉業遵而成之延熹八年四月  
廿九日甲子就袁府君諱逢字周陽汝南汝  
陽人孫府君諱琛字山陵安平信都人時令  
朱頡字宣得甘陵鄆人丞張昉字少游河南

京人左尉唐佑字君惠河南密人主者掾華  
陰王萇字德長

京兆尹勅監都水掾霸陵杜遷市石遺書佐  
新豐郭香察書刻者潁川邯鄲公脩蘇張工

闕君闕

右漢西嶽華山廟碑予得之御史宋君  
良弼集古錄引碑文云漢武帝巡省五  
嶽立宮其下宮曰集靈殿曰存仙門曰  
望仙而以為集靈宮者他書皆不見惟  
見此碑金石錄引漢地里志云華陰有

集靈宮水經注云敷水北經集靈宮而謂不特此碑載之及觀之董氏書跋云集靈宮漢志既書之桓譚嘗賦之張昺序曰世宗經集靈之宮而復謂三輔黃圖書其制度藝文類聚亦書其名則又金石錄之所未及者此亦可以見博古之難矣

此碑後題云新豐郭香察書楊文貞公跋謂漢魏之碑多不載書刻人氏名此獨詳焉遂因之有聞於今而文貞惟以

爲郭香書而不曰香察其意蓋疑香察不類人名故也隸釋云東漢循王莽之禁人無二名郭香察書者察蒞他人之書其說爲此文貞之所未知然洪氏亦不言爲何人書也按徐浩古迹記以碑爲蔡中郎書浩深於字學且生唐盛時殆非鑿空而言者洪氏失之於不考耳

漢玄儒先生婁壽碑

先生諱壽字元考南陽隆人也曾祖父脩春

秋以大夫侍講至五官中郎將祖父太常博士徵朱爵司馬親父安貧守賤不可營以祿先生童孩多竒岐嶷有志挽髮傳業好學不厭不修廉隅不飾小行溫然而恭慨然而義善與人交久而能敬榮且溺之耦耕甘山林之杳藹遁世無悶恬佚淨漠遲德衡門下學上達有朋自遠冕紳莘莘朝夕講習樂以忘憂郡縣禮請終不回顧高位厚祿固不動心麤絺大布之衣糲糶蔬菜之食蓬戶茅宇椽樞氣曠樂天知命權乎其不可拔也是以守

立音識真之坐音高尚其事鄉邠州鄰闕親愛懷年七十有八熹平三年正月甲子不祿國人乃相與論德處謚刻石作銘其詞曰  
皇矣先生懷德惟明優於春秋玄墨有成知賤爲貴與世無爭渾德衡門禮義滋醇窮下不苟知我者天身歿聲鬯千載作珍縣之日月與金石存

右漢玄儒先生婁壽碑集古錄云在光化軍乾德縣予自夷陵貶所再遷乾德令壽有墓在谷城界中而碑在墓側遂

遷碑還縣立於勅書樓下則碑在當時  
得免於毀棄者歐陽公之力也隸釋云  
玄儒先生蓋國人私謚猶陳寔之文範  
法真之元德而其末流之弊更相標榜  
三君八顧之日紛然而竒禍作矣予謂  
漢人之好標榜其罹禍固宜然自漢至  
今千有餘年而私謚不廢亦未聞有罹  
禍者此又不可以執一論也光化軍即  
今襄陽府之光化縣而乾德亦其地云  
漢蕩陰令張君碑

君諱遷字公方陳留己吾人也君之先出自  
有周周宣王中興有張仲以孝友爲行披覽  
詩雅煥知其祖高帝龍興有張良善用蕭何  
在帷幕之內決勝負千里之外析珪於留文  
景之間有張釋之建忠弼之謨帝遊上林問  
禽狩所有苑令不對更問嗇夫嗇夫事對於  
是進嗇夫爲令令退爲嗇夫釋之議爲不可  
苑令有公卿之才嗇夫喋喋小吏非社稷之  
重上從言孝武時有張騫廣通風俗開闢畿  
寓南苞八蠻西羈六戎北震五狄東勒九夷



荒遠既殞各貢所有張是輔漢世載其德爰  
既且於君蓋其纏綿績戎鴻緒牧守相係不  
殞高問孝弟於家中謇於朝治京氏易聰麗  
權略藝於從畋少爲郡吏隱練職位常在股  
肱數爲從事聲無細聞徵拜闕中除穀城長  
螯月之務不閑四門疇正之際休囚歸賀八  
百其民不煩於鄉隨就虛落存恤高年路無  
拾遺黎種宿野黃巾初起燒平闕市斯縣獨  
全子賤孔茂闕道區別尚書五教君崇其實  
詩云愷悌君隆其恩東里潤色君垂其仁邵

伯分陝君懿于棠晉陽珮璣西門帶弦君之  
體素能雙其勛流化闕基遷蕩陰令吏民頡  
頽隨送如雲周公東征西人怨思奚斯讚魯  
孝父頌段前詰遺芳有功不書後無述焉於  
是刊石整表銘勒萬載三代以來雖遠猶近  
詩云舊國其命惟新  
於穆我君既敦既純雪白之性孝友之仁紀  
行來本蘭生有芬克岐有兆綏御有勛利器  
不覲魚不出淵國之良幹垂愛在民幣沛棠  
樹温温恭人乾道不繆唯淑是親既多受祉

永享南山千祿無疆子子孫孫

惟中平三年歲在攝提二月震節紀日上旬  
陽氣厥杵感思舊君故吏韋萌等僉然同聲  
貨師孫興刊石立表以示後昆共享天祚億  
載萬年

右漢蕩陰令張君碑碑云君陳留己吾  
人治京氏易少爲縣吏徵拜郎中除穀  
城長遷蕩陰令後云中平三年二月故  
吏韋萌等刊石立表蓋其去思碑也字  
特完好可讀漢碑中之不易得者攷之

東漢地甲志蕩陰屬河內郡即今彰德  
府之湯陰縣已吾屬陳留郡即今開封  
府之夏邑縣

此碑予官京師時嘗於景太史伯時處  
見舊搨本不及錄近得之友人文徵仲  
按隸釋云東漢及魏其碑到今不毀者  
十才一二凡歐趙錄中所無者世不復  
有予生去宋數百年而此本兩見歐趙  
錄中蓋未嘗載隸釋并隸續亦無其文  
通志金石略所載碑目雖多然亦未之

及乃知昔人之言未必可信而舊物之  
在天壤間者固不可盡謂之無也

金薤琳琅卷第六

金薤琳琅卷第七

太僕少卿吳郡都

穆

漢堂邑令費鳳碑

漢堂邑令費鳳別碑

漢溧陽長潘乾校官碑

漢郎中鄭固碑

漢廬江太守范式碑

漢堂邑令費鳳碑

惟熹平六年歲格于大荒無射之月堂邑令  
費君寢疾卒嗚呼哀哉於是夫人元弟故

關三

字守卜胤追而誅之其辭曰

君體履柔和溫其如玉脩孝友乎閨闈執忠  
謇於王室立迹州郡仕更右職舉直措枉強  
禦闕貸貢孝三署勛譽有則出宰近甸民懷  
厥德色斯輕翔翻然高潔王人述職分闕班  
爵台闕二招助鼎調物退已進弟不營榮祿  
栖遲歷稔項領滯畜鄣土不庭黔民作闕一  
命君闕二政化闕行逆善遷惡三朞致道有  
耻且格文守旌功轉在堂邑垂拱不言而民  
帥伏三時之間卒以闕洽旻天不弔命也早

歿春秋六十六黎儀瘁陽泣涕連灑豈愛哉  
躬命不可贖臨終迷闕三內發祖業良田畝  
直一金推予弟息辭位讓財行義高邵卓不  
可及名實相副有始有卒闕二人善瘼方切  
惻

故吏故鄣施業字世堅義民堂邑戚忠忠年  
十有一慈考早隕喪以備於禮制蓬首而闕  
字壤而消辟地闕三行母氏以闕四而悼傷  
服闕菲五五縗杖莫未除廣陵之郡守東海  
字闕二聞寢疾而終卒凡百普悲闕四舜化比

屋之餘慶隨闕棺柩車哀以而逆之祖載已  
畢託還返其故鄉君闕其節操悲其有闕二  
每以闕五其老親忠闕二君厚德念君之仁  
恩聞君之隕隧剝斷而辛酸復截縗麻杖闕  
君之柩棺扶號而竭闕泣涕其闕八甫於岐  
山闕其從之迷君而到官上書而薦君盡  
禽息之闕三君之闕三君闕三字闕七於山闕  
列種嘉竒樹持為之潤解忠業與闕二猶君  
恩使然雖君有大化孰能爾者難子喪之終  
闕三思其顏而闕死可贖不愛闕二人今君

闕於彼卓譎而超倫吏民慕高蹤來者其如

雨偉名建闕一石垂示於闕二

門下功曹徐侃字元節主簿呂嘉字元闕主

史陳信字聖舉主記史闕忠字建臺門下游

徼闕二字叔騰門下賊曹闕二字聖臺門下

史曹助字仲臺闕吏呂常字孝讓從掾位徐

超字元貴

右漢堂邑令費君碑乃君夫人之弟卜

胤所撰蓋誄辭也辭之後載鄣土故吏

施業堂邑義民戚忠皆竭力送終而忠

之所行尤為卓絕攷之費君沒時忠有  
廣陵之役既聞計來奔祖載還鄉及葬  
有期復截衰麻扶號柩前列植丘木誠  
可謂之義矣漢去古未遠故民俗之厚  
如此若後世其可得哉

漢堂邑令費鳳別碑

君舅家仲孫甘陵石勛字子才載馳載驅來  
奔于喪庭肝催意悲感切傷心瞻彼碑誅懷  
之好音司馬慕蘭相南容復白珪仰之以彌  
高鑽之而彌堅不堪哀且思叙詩之一篇庶

幾昔子夏起夫子之所言其辭曰

君諱鳳字伯蕭梁相之元子九江太守之長  
兄也世德襲爵銀艾相亞遐祖之鴻軌拓  
前代之休蹤邈逸越而難繼非群愚之所頌  
仁義本於心慈孝著於性言不失典術行不  
越矩度清絜皦爾涅而不澤恤憂矜危施而  
不記由近及遠靡不覆載故能闡令名而雲  
騰揚盛聲而風布踐郡右職三貢獻計辟州  
式部忠以衛上漢安二年吳郡太守東海郭  
君以君有透地之節自公之操年卅一舉孝

廉拜郎中除陳國新平長神化風靡惠以流  
下靜而為治匪煩匪擾乾乾日禩

此黔

首功成事就色斯高舉宰司委職位思賢以  
自輔玄懿守謙虛白駒以

闕一

隄丹陽有越

寇沒

闕四

命君討理之試守故鄣長蓋危亂

有不讓又畏此之

闕二

而

闕

牧爰止其師旅

鷗若飛鷹鷂

闕一

若夫虓虎彊者綏以德弱

者以仁撫簡在上帝心功訓而特紀轡輿宰

堂邑基月而致道祝

闕四

遂據于御尹中表

之恩情兄弟與甥舅薦與女蘿性樂松之茂

好聞君顯令名舉宗為歡喜不悟奄忽終藏

形而匿景耕夫釋耒耜桑婦投鉤莒道阻而

且長望遠淚如雨策馬循大路褰裳而涉洧

闕二

歌

闕一

離思黃鳥集于楚惴惴之臨穴

送君於厚土嗟嗟悲且傷每食

闕

不絕夫人

篤舊好不以存亡改文平感渭陽悽愴益以

甚諸姑咸璧踊爰及君伯姊孝孫字元宰生

不識考妣追惟厥祖恩蓬首斬縗杖世所不

為流稱於鄉黨見吾若君存剥裂而不已

一別會無期相去三千里絕翰永忼慨泣下

不可止

右漢堂邑令費鳳別碑歐陽公直以為費鳳碑趙明誠則以為費鳳碑陰隸釋謂費氏父子三碑並列於吳興校官蓋鳳之父况為梁相有碑而鳳亦自有碑此則鳳中表石勛字子才之所述也集古後錄謂勛不遠三千里而會中表之喪觀此情友親厚之心可以悠然而生則隸釋所稱別碑為是三碑今皆不存此予得之四明豐解元坊宋搨本也

漢溧陽長潘乾校官碑

蓋漢三百八十有七載闕三字于闕四字銘工著

斯金石界誅曰

溧陽長潘君諱乾字元卓陳國長平人蓋楚大傅潘崇之末緒也君稟資南闕二字之闕四字德

之絕操髻鬢闕一字敏闕一字學典謨祖講詩易剖演

奧藝外覽百家衆闕一字契聖抱不測之謀秉高

世之介屈私趨公即仕佐上郡位既重孔武

赴箸疾惡義形從風征暴執訊獲首除曲阿

尉禽姦剗猾寇息善歡復孤竹之廉蹈公儀



之絜察廉除茲初厲清肅賦仁義之風闕三

之跡垂化放乎岐周流愛雙乎闕二親賢寶

智進直退慝布政優優令儀令色獄無吁嗟

之冤野無叩匈之結矜孤頤老表孝貞節重

義輕利制戶六百省無正繇不責自畢百姓

心歡官不失實於是遠人聆聲景附樂受一

廛既來安之闕役三年惟泮宮之教反闕俗

之禮構脩學宮宗懿招德既安以寧于侯用

張邊豆用陳發彼有的雅容闕閑鐘磬縣矣

于胥樂焉乃作叙曰

翼翼聖慈惠我黎蒸貽我潘君平茲溧陽彬

文赳武扶弱抑疆闕刈骹雄流惡顯忠咨疑

元老師賢作朋脩學童冠琢質繡章寔天生

德有漢將興尚且在昔我君存今闕此龜艾

遂尹三梁永世支百民人所彰子子孫孫畀

爾熾昌

丞沛國銍趙勲字夢伯左尉河內汲董並字

公房右尉豫章南昌程陽字孝遂時將作吏

名戶曹掾楊淮議曹掾李就議曹掾桓檜戶

曹史賀闕從掾位侯祖主記史吳超門下史

吳訓門下史吳翔門下史時球

光和四年十月己丑朔廿一日己酉造

漢校官碑宋紹興十一年溧水尉喻仲  
遠得於固城湖濱置之官舍今在孔廟  
之大門右長樂陳長方雖嘗碑其所得  
本末釋文則未之見碑以靈帝光和四  
年歲在辛酉造距今凡一千一百五十  
三年番陽洪景伯先生出字爲之釋謂  
挈爲契羣爲黎畀爲俾榘爲野賚爲責  
剗去其刀賢去其貝干侯與豸侯通尚

且謂太公周公可謂精審有據其餘不  
可辨者尚有二十七字今觀首行自三  
百字以下上斯字凡十有六字比之洪  
氏作釋文時又皆不可攷且如第三行  
之字之下是禱字禱下闕一字有天字  
敏之上是克字衆之下是儁字退之下  
是慝字役之上爲復反之下爲失此之  
上爲即皆隱隱可見洪則悉以爲闕又  
如旣安且寧則以爲且寧梅檜則以爲  
桓檜豈當時誤於墨本而然耶溧陽志

至謂元卓爲元貞是又以名乾而傳會也禧承乏於茲暇日與士友曹國傑摩沙久之得其二三因以洪先生釋文列於上僭附所見於其下勒諸樂石以補前脩之所未及者餘尚俟博雅君子云至順四年龍在癸酉夏五月文學掾濟陰單禧謹識

右漢溧陽長潘乾校官碑在今南畿溧水縣學蓋溧水即漢溧陽地也予初得此碑而不知其有釋文近始得之乃元

至順四年校官單禧所爲而刻之者也禧謂此碑宋紹興中縣尉喻仲遠得於固城湖濱置之官舍則其得免於毀棄仲遠之力也禧又有跋謂考訂碑文與隸釋不同者二十七字而復辨溧陽志之失可謂有功於文字者故備錄之

漢郎中鄭固碑

君諱固字伯堅著君元子也含中和之淑質履上仁闕三孝友著乎閨門至行立乎鄉黨初受業於歐陽遂窮究于典籍膺游夏之文

學襄冉季之政事弱冠仕郡吏諸曹掾史主  
簿督郵五官掾功曹入則腹心出則爪耳忠  
以衛上清以自脩犯顏蹇諤造昧詭辭加以  
好成方類推賢達善遂遁退讓當世以此服  
之邦后珍瑋以為儲舉先屈計掾奉我關貢  
清眇冠乎群彥德能簡乎聖心延熹元年二  
月十九日詔拜郎中非其好也以疾固辭未  
滿期限從其本規乃遘凶愍年四十二其四  
月廿四日遭命隕身痛如之何先是君大男  
孟子有楊烏之才善性形於岐嶷關二見於

垂髫年七歲而夭大君夫人所共哀也故建

關共墳配食斯壇以慰考妣之心琦瑤延以

為至德不紀則鍾鼎奚銘昔姬關二武弟述

其兄綜關四行於蔑陋獨曷敢忘乃刊石以

旌遺芳其辭曰

於惟郎中寔天生德願親誨弟虔恭竭力教  
我義方導我禮則傳宣孔業作世模式從政  
事上忠以自勗貢計王庭華夏歸服帝用嘉  
之顯拜殊特將從睢意色斯自得乃遭氛災  
隕命顛沛家失所怙國關忠直俯哭誰訴仰

號焉告嗟嗟孟子苗而弗毓奉我元兄脩孝  
罔極魂而有靈亦歆斯勒

右漢郎中鄭固碑歐陽公謂碑文磨滅  
官闕卒葬年月皆莫可考予家本磨滅  
尤甚蓋以去歐公之遠也而隸釋所載  
文字獨完其云君著君之子延熹元年  
四月廿四日遭命隕身年四十二則門  
闕與卒固可考也歐公所錄在隸釋之  
前而乃云云若此不可曉也

漢廬江太守范府君碑

君諱式字闕八功存有夏寔曰御龍闕胙商

周世昭其隆晉主夏盟有士會者光演弘謨

翼崇霸業錫邑命族闕為范氏則其後也君

稟靈醇之茂度體玄亮之殊高徽柔懿恭明

允篤恕九德靡爽百行淵備弘道耽藝恢韜

墳籍探賸研機罔深不入若乃立德隆禮樹

節寶真志諒足以弼國篤友足以輔仁用能

昭其洪懿聲充宇甸接華彥於汝墳潤枯斃

於荆漢超管鮑之遐蹤信靈諱乎炳煥是以

化泉流芳闕馮舊耀仁闡於權輿濟俗侔

闕

乎皇訓群公偉焉弓旌盈路再讓考闕二三

府舉高第侍御史拜冀州刺史糾剔瑕慝六

教允施翰飛肅於鷹揚典刑闕二軌闕帝闕

其勲遷廬江太守擬泰和以陶化昭八則以

隆治彌闕弘略惠訓亡倦闕二協闕三齊闕二

字清源之深閱寶疏氏之至順以疾告辭韜

光潛耀詠琴詩以寧闕九其猶充洽外內寔

紹德之奧藪而儀民之淵表也未亮三事闕三

字終闕六常山相暨子汜孫而胤嗣罔繼粵

青龍三年正月丙戌縣長汝南薛闕七感靈

墀之不饗思隆懿模以紹奕世乃與縣之碩

儒咨典謨之中闕同宗闕三之胄昭告祖考

俾守厥祀本著宣融之祚人神協休茂之

慶焉禮也於是鄉闕二上計掾翟循州部泰

山從事史翟邵等僉以為君雖輝名載籍光

颺前列而靈墳亡闕儀問靡述遂相與略依

舊傳昭撰景行刊銘樹墓以聲百世其辭曰

於昭上德實唐之胤誕表靈和蹈規履信窮

神周覽祗道之訓邁德徽猶鴻漸闕舊穢彼

夸毗寶此醇懿以文會友以仁翼闕敷化濟

殖群生以遂永言孝思民之攸暨如何昊天  
不信其軌明德不報胤 亡紀爰輯訓典詢  
爾髦士育茲赫闕以永遐祉詒厥孫謀燿于  
萬祀

右漢廬江太守范式碑式仕漢為侍御  
史拜荊州刺史遷守廬江官亦不卑而  
史氏列之獨行傳中蓋以式之可重者  
在厚於友誼其官爵固可略也此碑但  
云篤友足以輔仁及云超管鮑之遐踪  
其外更無他語洪丞相謂未足以光颺  
盛德是已唐李嗣真書後品以碑為蔡  
伯喈書考之碑立於魏明帝青龍三年  
則非伯喈之筆明矣後鄭氏金石略亦  
云是蔡公書則又承書品之誤也

金薤琳琅卷第七

金薤琳琅卷第八

太僕少卿吳郡都穆

隋皇甫府君碑

隋龍藏寺碑

隋姚恭公墓誌銘

隋緣果道場磚塔記

隋柱國左光祿大夫弘義明公皇甫府君碑

銀青光祿大夫行太子左庶子上

柱國黎陽縣開國公志寧製



夫素秋肅煞勁草標於疾風叔世艱虞忠臣  
彰於赴難銜須授命結纓殉國英聲煥乎記  
牒徽烈著於旂常豈若豐起蕭墻禍生蕃翰  
強踰七國勢重三監其有蹈水火而不辭臨  
鋒刃而莫顧激清風於後葉抗名節於當時  
者見之弘義明公矣君諱誕字玄憲安定朝  
邠人也昔立効長丘樹績東郡太尉裂壤於  
槐里司徒胙土於彤門是以車服旌其器能  
茅社表其勲德銘功衛鼎騰美晉鍾盛族冠  
於國高華宗邁於藥郤備在史牒可略言焉

曾祖重華使持節龍驤將軍梁州刺史潤木  
暉山方重價於趙璧媚川照闕曜奇采於隨  
珠祖和雍州贊治贈使持節散騎常侍車騎  
大將軍儀同三司膠涇二州刺史高衢將騁  
遽友追風之足扶搖始搏早墜垂天之羽父  
璠使持節驃騎大將軍開府儀同三司隨州  
刺史長樂恭侯橫劔桂柯威重冠軍柝瑞蕃  
條聲高勃海公量包申伯稟嵩山之秀氣材  
兼蕭相降昂緯之淑精據德依仁居貞體道  
含章表質詎待變於朱藍恭孝為基寧取訓

於橋梓鋒剗犀象百練挺於昆吾翼掩鴛鴦鴻  
九萬奮於溟海搏韜產文瞻卿雲孝窮温  
清之方忠盡匡救之道同何充之器局被重  
晉君類荀攸之宏旨見知魏主斯故包羅衆  
藝囊括羣英者也起家除周畢王府長史榮  
名蕃牧則位重首寮衮服睢陽則譽光上客  
既而蒼精委馭炎運啓岳作貳邊服寔資令  
望授廣州刺史悅近來遠變輕詵於雕題伐  
叛懷柔漸淳化於緩耳蜀王地處維城寄深  
磐石建旟玉壘作鎮銅梁妙擇竒材以爲僚

佐授公益州總管府司法昔梁孝開國首辟  
鄒陽燕昭建邦肇徵郭隗故得馳令問於碣  
館播芳猷於平臺以古方今彼此一也尋除  
尚書比部侍郎轉刑部侍郎趨步紫庭光映  
朝列折旋丹地譽重周行俄遷治書侍御史  
彈違糺隱時絕權豪霜簡直繩俗寢貪競隨  
文帝求衣待旦志在恤刑呪網泣辜情存緩  
獄授大理少卿公巨細必察同張季之聽理  
寬猛相濟比于公之無寃但禮闈務殷樞轄  
寄重允膺此職寔難其人授尚書右丞洞明

政術深曉治方臧否自分條目咸理丁母憂  
去職哀慟里閭隣人為之罷社悲感衢路行  
客以之輟歌孝德則師範彞倫精誠則貫徹  
幽顯雖高曾之至性何以加焉尋詔奪情復  
其舊任于時山東之地俗阜民澆雖預編民  
未行聲教詔公持節為河北河南道安撫大  
使仍賜米五百石絹五百匹公輜軒布政美  
冠皇華之篇擁節觀風榮甚繡衣之使事訖  
反命授尚書左丞然并州地處參墟城臨晉  
水作固同於西蜀設險類於東秦寔山河之

要衝信蕃服之襟帶授公并州總管府司馬  
加儀同三司公贊務大邦聲名籍甚精民感  
化黠吏畏威屬文帝劔爾空留鑾蹕莫反楊  
諒率太元之甲擁河朔之兵方叔段之作亂  
京城同州吁之挺禍滌上雖無當璧之兆乃  
懷奪宗之心公備說安危具陳逆順翻納魏  
勃之榮反被王悍之災仁壽四年九月溘從  
運往春秋五十有一萬機起殲良之歎百辟  
興喪予之悲切孔氏之山頽痛楊君之棟折  
贈柱國左光祿大夫封弘義郡公食邑五千

戶謚曰明公禮也喪事所須隨由資給賜帛  
五千段粟三千石惟公温潤成性夙表白虹  
之珍黼黻為文秀缺五字行已窮於六本蘊德

包於四科延閣曲臺之奇書鴻都石渠之祕

說莫不尋其枝葉踐其隩隅譬越箭達犀飾

之以括羽楚金切玉加之以磨缺一救乏同

於指困親識待其舉火進賢方於推轂知己

俟以彈冠存信捨原黃金賤於然諾忘身殉

難性命輕於鴻毛齊大小於冲襟混寵辱於

靈府可謂缺四冠冕時雄者也方當亮采泰

階參綜機缺一豈謂世逢多故運屬道消志

展經邦之謀奄鍾非命之酷世子民部尚書

上柱國滑國公無逸以為邢缺一之下缺三

仲之缺三之東誰知子孟之墓乃雕戈勒石

騰實飛聲樹之康衢永表芳烈庶葛亮之隴

鍾生禁之以樵蘇賈逵之碑魏君歎之以不

朽乃作銘曰

缺二膺期穆帝運榮經綸執鈞匡濟門承積

慶世挺偉人夜光愧寶朝采慙珍雲中北陸

日下方苟抑揚元缺一名馳碣石聲高建

禮珥華憲臺握蘭文陛分星裂土建侯開國  
輔籍正人相資懿德中臺輟務晉陽缺十字相  
成師構難太叔興戎建德効節夷吾盡忠命  
屯道著身歿名隆牛亭始卜馬獵初封翠碑  
刻鳳丹旆圖龍煙缺

銀青光祿大夫歐陽詢書

右隋柱國左光祿大夫皇甫誕碑于志  
寧撰歐陽詢正書金石錄謂嘗得誕墓  
志又得此碑與北史及隋書參攷以正  
史氏之謬又謂碑與墓志所述亦有不  
同墓志今不得見碑在陝西西安府學  
不甚缺壞蓋歐書中之得意者也

隋龍藏寺碑

竊以空王之道離諸名相大人之法非有去  
來斯故將喻師子明自在如無畏取譬金剛  
信畢竟而不毀是知涅槃路遠解脫源深隔  
愛慾之長河間生死之大海無船求渡既似  
龜毛無翅願飛還同兔角故以五通八解名  
教攸生二帝三乘法門斯起檢麓攝細良資  
汲引之風挽滿陷深雅得脩行之致若論軋

闍之城皆安芭蕉之樹盡空應化詎真權假  
寧實釋迦文字缺一說字缺一之字缺一須菩提豈

證果之人然則習因之指安歸求道之趣奚  
向如幻如夢誰其受苦如影如嚮誰其得福

是故維摩詰具諸佛智燈字缺一之坐斯來舍  
利弗盡其神通天女之花不去故知業行有

優劣福報有輕重若至凡夫之與聖人天堂  
之與地獄詳其是非得失安可同日而論哉

往者四魔毀聖六師謗法拔髮翹足變吞  
麻李園之內結其惡黨竹林之下亡其善聚

護戒比丘翻同窻草持律字缺一等霜蓮慧殿

仙宮寂寥安在珠臺銀閣荒涼無處離離綴

彩寧勞周客含含奏曲詎假殷人我大隋乘

御金輪冕旒王字缺一上應天命下順民心飛

行而建鴻名揖讓而升大寶匪結農軒之陣

誰徇湯武之師稱臣妾者遍於十方弗遇蚩

尤之亂執玉帛者盡於萬國無陷防風之禍

斯乃天啓至聖大造區域垂衣化俗負宸宇

民昧日紫宮終朝青殿道高羲燧德盛虞唐

五福咸臻衆貺畢集低茹出月搖蕙含風沉

壁觀青龍負握河之紀功成治定神奉益地  
之圖於是東暨西漸南阻北邁隆禮言洽至  
樂云和感天地而動鬼神辯尊卑而明貴賤  
而尚勞已亡倦求衣靡息豈非攸攸黔首垢  
障未除擾擾蒼生蓋纏仍擁所以金編寶字  
玉牒綸言滿封盈函雲飛雨散慈愛之旨形  
於翰墨哀愍之情發於衿抱日月所照咸賴  
陶甄陰陽所生皆蒙鞠養故能津濟率土救  
護溥天協獎愚迷扶導龍瞽樹茲法雨使潤  
道牙燒此戒香令薰佛慧脩第壹之果建最

勝之幢拯旣滅之文匡以墜之典忍辱之鎧

滿缺二都微妙之臺充於赤縣豈直道羅什

有寄弘通故亦迦葉目蓮聖僧斯在龍藏寺

者其地蓋近於燕南昔伯珪取其謠言缺三

水母恤往而得寶窺代常山世祖南旋至高

邑而踐柞靈王北出登望臺而臨海青山斂

霧淥水揚波路款晉而適秦途通缺一而指

衛缺二之落矩步非遙平原之樓規行詎遠

尋派避世彼亦河人幽閑博敞良爲福地太

師上柱國大威公之世子使持節在武衛將

缺一上開府儀同三司恒州諸軍事恒州刺  
史鄂國公金城王孝僊世業重於金張器識  
逾於許郭軍府號為飛將朝廷稱為虎臣領  
袖諸缺一冠冕羣俊探賸索隱應變知機著  
義尚訓御之勲立勲功事勞之績廊廟推其  
偉器柱石捐其大材自馳傳滄藩建旗缺一二  
招懷歎逸蠲復逃亡遠視廣聽賈琮之按冀  
部賞善戮惡徐邈之處涼州異軫齊奔古今  
一致下車未幾善政斯歸瞻彼伽籃非因草  
創每奉勅勸獎州內士庶壹萬人等共廣福

田公爰啓至誠虔心徙石施逾奉蓋檀等布  
金竭黑水之銅罄赤岍之玉結瑠璃之寶網  
飭纓絡之珍臺於是靈刹霞舒寶坊雲構崢  
嶸膠葛穹隆謫詭九重壹柱之殿三休七寶  
之宮彫梁刻桷之竒圖雲畫藻之異白銀成  
地有類悉覺之談黃金鏤楯非關句踐之獻  
其內閑房靜室陰牖陽窓圓井垂蓮方踈度  
日曜明璫於朱戶殖芳卉於紫墀地映金沙  
似遊安養之國簷隱天樹疑入歡喜之園夜  
漏將竭聽鳴鐘於寺內曉相旣分見承露於



雲表

坐來會之衆何憂

缺字

然飲食持

鉢之侶奚念粵以開皇六年歲次鶉火在巖  
粗就庶使皇隋寶祚與天長而地久種覺花  
臺將神護而鬼衛乃爲詞曰多羅秘藏毗尼  
覺道斯文不滅憑於大造誰薰種智誰壞煩  
惚猗歟我皇實弘三寶慧燈翻照法炬還明  
菩提果殖救護心生香樓並構貝塔俱管充  
遍世界彌滿國城憬彼大林當途向術於穆  
州后仁風遐拂金粟施僧珠纓奉佛結瑤昔  
宇構瓊架室鳳穴槩日虹梁入雲電飛窓戶

雷驚椽焚綺籠金鏤縹壁椒薰絳錦亂色丹  
素成文髮髯雪宮依恠月殿明室結悞幽堂  
啓扇缺字一虛未窺跼龍誰見帶風蕭瑟含烟

慈蔭西臨天井北拒五臺川谷苞異山林育  
材蘇秦說反樂毅奔來鄒魯媿俗汝穎慙能  
惟此大城壞異所踐踈鍾嚮度層磐露法八  
聖四禪五通七辯戒香恒馥法輪常轉

開皇六年十二月五日題寫

齊開府長兼行參軍九門張公愷之缺  
右隋龍藏寺碑齊張公愷撰而不著書

人名氏集古錄謂寺已廢碑在常山府署之門常山即今之真定予近以使事過之聞府治東二里龍興寺有古銅佛一軀崇七十二尺閣之覆者崇百有三十尺與太守同年李君往遊其間見殿前一古碑其趺已沒土中讀之乃公愷文蓋寺在隋名龍藏歐公謂寺廢與碑在常山府署蓋未嘗親歷其地故誤書耳

隋左屯衛大將軍左光祿大夫姚恭

公墓誌銘并序

缺四諱辯字思辯武威人也導清源於媯汭

肇崇構於軒丘世缺二斯缺一五世祖泓為

晉所滅子孫播越居于武威曾祖讚撫軍缺

字軍將軍武威太守並以碩量偉才佐時匡

國父寶散騎常侍缺二山川降神象緯幼而

風韻開爽志節通亮弓殫百步之奇劍缺

氣馳名遂以材官入選周保定四年起家宗

待下士天和二年缺二虧勝群帥見囚公頻

進奇謀竟弗能用乃以舟師先濟朝廷缺二

統營校公撫養士卒勸課農桑莫不家實食廩人知禮節缺二賞五年從周武帝平定晉州摧殄高壁十二月進屠并州既缺一公獨為後距轉戰不衰皇輿獲安公之力也頻蒙優賞以累缺六年從定相州以前後功授大都督封安養縣開國子邑四缺檢校武侯兵事又命公隨上柱國拔崇於武陟合戰又於野馬缺相濟寔繁有徒公建旆遄征攝弓言邁推鋒接戰充著奇功大象缺二戶開皇元年授上開府儀同三司進爵為公增

邑為一千戶

缺二

所屆即事戎車公誠勇奮

發義同閫外屢出奇兵頻摧醜虜缺二天府

凡厥賞賜散之士卒二年匈奴復入涼州詔

以公為行軍缺二前後衝擊晝夜攻圍校尉

之井既枯將軍之泉又竭空有思梅之缺一

以亡為存策勳命賞理在不次五年授右武

候驃騎將軍霍去病缺一茂如也六年授雲

州道水軍總管戈船掩渚巨艦浮川河湟肅

缺一匪曰崇墉基峙聳堞相望邊柝弗驚控

弦遠逝其年授使持節河缺化若神明十

年檢校疊州總管河州刺史行疊州刺史事

公才略字缺三弘政教安民和衆於是乎在十

二年轉授左武侯將軍尋為涼州字缺一邊烽

寢候毳幕旃裘望風斂迹十六年使持節靈

州總管諸軍事字缺二俗易風移政成暮月十

八年授原州道行軍總管十九年授環州道

缺一總管公屢總戎律特精邊事每秋風起

塞胡騎揚塵折衝之狂非公缺二年授左武

侯大將軍進爵蔡陽郡開國公食邑一千五

百戶大啓字缺二皇丘欽明御籙睿聖慕圖特

荷天眷恩遇隆重密勿禁衛知無不為字缺二

威等同進位大將軍左武侯大將軍如故三

年以母憂去官其年有字缺二自天幾於毀滅

僂俛王事杖而後起四年以官方草創授金

紫光祿大夫光祿大夫如故車駕北巡諸

蕃朝朔以舊典糾察整肅軍容乃令公字缺一

旌門洞張內外肅然事嚴細柳吐谷渾大保

五期尼樂周等率衆歸附字缺一鑿蹕西幸底

定渾國乃以公為鬱卑道將軍旗鼓所振莫

不摧殄俘字缺一右光祿大夫左屯衛大將軍

如故乃獻凱廟庭禮崇備物六軍之長車  
駕南巡江都以公京師留守職居爪牙任惟  
心膂出處崇重朝野榮之大業七年三月遘  
疾十九日薨於京兆郡春秋六十有六惟公  
體量宏達缺興義造次弗違虛已推賢始終  
同致加以雄圖恢廓竒略弘遠氣有餘勇莫  
之與抗善於御撫得士卒之心長於政術致  
廉平之美自入統禁旅出缺二所夙夜匪懈  
簡在帝心至於敬友穆親輕財貴義家稟誠  
孝奉以周旋訓不與善遽此歸全知與不知

莫不流涕粵以其年十月癸丑朔二十一日

缺一有詔故左屯衛大將軍右光祿大夫姚

思辯性理和謹秉心恭慎歷任缺式表哀榮

可贈左光祿大夫又蒙賜物八百段粟麥一

千石謚曰恭公

祀缺長瀾若水遠馥薰風時賢繼及世德斯

隆勤王成務啓羈垂功炳靈不已缺冥照落

鴈窮能通援盡妙蹶張選勇期門待詔職分

七萃官聯五營缺陪衛出擁高旌汜水兵略

常山陣勢卓犖明謀沉深節制功有必取筭

無遺計缺恩寵顯赫身名執恭履順守滿持  
盈方陪紀岳遽掩佳城遊魂不歸逝川缺春  
秋邇代徽猷永遠

右隋左屯衛大將軍姚辯墓誌銘虞世  
基撰歐陽詢正書志稱辯精於邊事屢  
立大功蓋老將也其官至大將軍而死  
謚恭公爵亦尊矣而隋史不為立傳向  
非率更之書後世不復知有辯此古人  
墟墓之文所以必托之名筆豈無意邪  
隋江夏縣緣果道場博塔下舍利記

夫至理空冲尋求之源悠緬法身寂寞無方  
之應奄臻至如花壘未燃駐影留髮香薪已  
燎散體分形故有寶塔珍龕崔嵬四園之上  
雲興地踊照曜八國之中俾我聖迹未之湮  
墜緣果道場者梁天監十二年太歲癸巳長  
史劉端捨宅為寺有命過僧歸閣梨盡心建  
造閣梨降自江缺一氏族未詳戒慧總持甚  
有靈驗於是鴻基勝趾締構日新三業薰脩  
七財具足以今大隋大業九年昭暘之歲江  
夏縣緣果鄉長劉大懿等遵依勅旨共三鄉

仕民奉

缺二字

齊與道場七層塔一所安鎮

此地次有清信弟子黃慧龍慧俊慧達等兄

弟並德

缺一字

佳雅難兄難弟誓立五根願弘

四事於所住宅福瑞累彰亡父於大業三年

二月乃於食內感舍利一枚大小相懽覩茲

希有安止水器且浸且浮旋遶父之光明遍

室頂戴虔禮日申供養到七年正月俊女雞

娘又感二枚斯實迹現難思抑聞圖籍次有

弟子李藥玉信首宿馳賢才簡足雖室無瑞

井手闕金錢每用放濟居心傾捨為業以開

皇廿年行至常州境感舍利一枚到大業五

年於所住宅又感二枚昔者阿難捧函如來

讚其希有康會擬寫吳主嗟其神異詞諸經

誥今古同符以今季夏六月八日奉送散身

永寔基下衆緣贊助普設大齋方俟七級巍

峩接霄房而颺采九盤煜曜寶鐸韻而流聲

上資帝朝爰泊遐邇設使芬盡方城五分之

身常住石銷天袂金剛之地巖然敢忘議善

乃為銘曰

茫茫宇宙悠悠世間九地銜海四

缺二字山三

途有獄五道無關魂隨動泊識缺一循還至

聖何像嶷爾悒怕示現無方迦維垂迹等救

燒燃通悲幽溺息衆權城椎輪火宅八十化

盡天人喪師撫膺雨淚香水缺一毗四王典

護八國均持機緣靡隔靈祥俟時坊墳式建

層表臨空非因鬼力詎假神工金盤仰露寶

鐸搖風山移川徙徽業興隆日本五始良

右隋江夏縣緣果道塲碑塔記無書撰

人氏名記中載舍利瑞應之事不一此

非吾之所知但隋碑之傳也者絕少以

予嗜好之薦集錄之勤三十年間所得

隋碑惟皇甫府君龍藏寺姚辯墓志及

此而已

金薤琳琅卷第八





